

## Pe Zornade Europeane des Lenghis “Una splendida favella” e rive in TV

La ARLeF e fâs fieste ai 26 di Setembar  
cuntun apontament dut dedicât al furlan

**“Una splendida favella - L'avventurosa storia della lingua friulana e della sua letteratura”** e rive in television, joibe ai 26 di Setembar, propit in ocasion de Zornade Europeane des Lenghis. Su Telefriuli (canâl 11), aes 22.00, e larà in onde la performance cun protagoniscj Flavio Santi (docent di divignince furlane te Universitât de Insubria) e William Cisilino (dretôr de ARLeF - Agenzie regionâl pe lenghe furlane).

Acetant la sfide di contâ plui di mil agns de storie de lenghe e de sô leterature in mancul di une ore, Santi e Cisilino a compagnin il public intun viaç inedit che al rispuint a domandis tant che: cuâi sono i popui che a àn dât forme ae lenghe ladine plui orientâl? Cui sono lis feminis e i oms che, za de Ete di Mieç, a àn sielzût di rivendicâ l'ûs de marilenghe par fâ art? Ma soledut: parcè il furlan isal une lenghe?

*“Al è un itinerari che al mene fin a vuê, par po capî cuâl che al sarà il furlan di doman e, in gjenerâl, cemût che a funzionin lis lenghis”* al à anticipât Cisilino. *“O cîr di dimostrâ trop che la leterature furlane e sedi di simpri une vore moderne, in linie cu lis leteraturis talianis e europeanis, e che no à nuie di mancul di chestis”* al marche Santi, che inte performance al lei cualchi poesie che e dimostre la grandece e la originalitât dal furlan.

Spietant "Una splendida favella", aes 21.00, simpri su Telefriuli, al è in program un speciâl dedicât ae lenghe furlane. A intervignaran il president de ARLeF, Eros Cisilino; la tiktoker dal canâl [Tic e Tac Furlan](#), Greta Fabbro; Michele Flaibani, dretôr organizatîf dal scandai sociolinguistic "Furlan Contât - Tire fûr la lenghe", davuelt di pôc di IRES Fvg; il youtuber di [YouPalTubo](#), Nicolas Fonzar; il za citât professôr Flavio Santi; e l'illustradôr, "pari" dai Gnognosaurs, Andrea "Dree" Venier.

Udin, ai 24 di Setembar dal 2024

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<